



18 August 2021

Kerjasama antara PERKESO, Majikan, Universiti



Ketua Eksekutif Pertubuhan Keselamatan Sosial (PERKESO), Datuk Seri Dr Mohammed Azman Aziz

KUALA LUMPUR: Pertubuhan Keselamatan Sosial (PERKESO), Persatuan PKS Malaysia dan lima Institusi Pengajian Tinggi Swasta (IPTS) menjalankan kerjasama tiga penjuru bertujuan membina hubungan strategik jangka panjang di sini, hari ini.

Kerjasama itu dimeterai menerusi dua Memorandum Persefahaman (MoU) yang ditandatangani pada majlis dilangsungkan secara maya, menyaksikan PERKESO dan Persatuan PKS Malaysia bersama lima IPTS iaitu Universiti HELP, Universiti Taylors, INTI International University and Colleges, Universiti Tunku Abdul Rahman (UTAR) dan Universiti Kolej Tunku Abdul Rahman.

Ketua Eksekutif Pertubuhan Keselamatan Sosial (PERKESO), Datuk Seri Dr Mohammed Azman Aziz Mohammed, berkata sebagai agensi kerajaan yang menerajui perlindungan keselamatan sosial dalam negara, PERKESO komited melindungi golongan pekerja daripada sebarang musibah seperti bencana pekerjaan, keilatan, kematian juga kehilangan pekerjaan.

Selain itu, katanya, PERKESO prihatin dengan mengambil tanggungjawab untuk memberikan pendedahan kepada majikan, dalam kalangan PKS mengenai

kepentingan mencarum serta mendapatkan perlindungan keselamatan sosial kepada pekerja mereka.

"Sehingga Julai 2021, penularan COVID-19 mengakibatkan kira-kira 150,000 pekerja formal kehilangan pekerjaan dan lebih 768,700 individu kekal menganggur.

"Melalui perlindungan seperti ini sekurang-kurangnya dapat menjamin keselamatan dan kesejahteraan golongan pekerja sekali gus mengurangkan beban majikan jika sesuatu perkara yang tidak diingini berlaku," katanya.

MoU menyaksikan PERKESO diwakili Mohammed Azman manakala Persatuan PKS Malaysia diwakili Presidennya, Datuk Michael Kang.

Bagi lima IPTS terbabit diwakili oleh Naib Canselor Universiti HELP, Datuk Dr Paul Chan, Presiden UTAR, Prof Ir Dr Ewe Hong Tat; Presiden Universiti Kolej Tunku Abdul Rahman, Prof Ir Dr Lee Sze Wei; Pro Naib Canselor Universiti Taylors, Yong Yut Ho dan Ketua Pegawai Eksekutif Interim INTI International University and Colleges, Chong Kok Wai.

Mohammed Azman, berkata bagi pengangguran belia menunjukkan, peningkatan dari 10 peratus sebelum pandemik kepada 13 peratus kini.

"Keadaan ini memberi kesan kepada tempoh pengangguran graduan sehingga mengurangkan keupayaan mereka mengumpul pengalaman bekerja dan kemahiran yang relevan bagi memasuki pasaran pekerjaan.

"Kerjasama jangka panjang tiga penjuru di antara PERKESO, majikan dan pihak universiti bertujuan meningkatkan kadar penempatan pekerjaan graduan dari IPTS terbabit menerusi program pasaran buruh aktif yang dilaksanakan PERKESO.

"Menerusi MoU ini, PERKESO berharap dapat mengurangkan ketidaksepadanan antara kemahiran yang disediakan pihak universiti dengan kemahiran yang diperlukan majikan," katanya.

Sementara itu, Michael berkata kerjasama itu dapat membantu golongan belia dan graduan yang terkesan sepanjang tempoh pandemik melalui penyediaan peluang kerjaya dan program latihan.

"Pendekatan sinergi tiga penjuru bersama-sama PERKESO dan IPTS membolehkan Persatuan PKS Malaysia membantu golongan itu menerusi perkongsian data serta dialog sosial dua hala bagi tujuan meningkatkan penempatan pekerjaan," katanya.

